

**MINISTER DI TURISMO TA
ANUNCIA E PROYECTO PA
EMBEYECE “WELCOME FESTIVAL
PLAZA” CU TA BAY ELEVA E
EXPERIENCIA DI NOS BISHITANTE
NAN CRUCERO**



WWW.SOLODIPUEBLO.COM



SOLODIPUEBLO@GMAIL.COM

**HOTEL SECRETS LO
NO AFECTA VISTA DI
PLANETA SATURNO
PA BISIÑANAN,
SEGUN SENTENCIA
DI HUES**




**TUMBERONAN DI TAYA A
RETIRA DI FESTIVAL DEBI
NA FALTA DI PREPARACION
Y PROMOCION DI SMAC**



**SENTENCIA DI HUES A
CONFIRMA CU HOTEL SECRETS
NO TA FORMA MOLESTER PA
BISIÑANAN; BOUWVERGUNNING
TA CORECTO!**



**DESCONOCIDONAN A
HORTA AUTO Y MAND'E
INTENCIONALMENTE DEN LAMA
NA SPAANS LAGOENWEG**



SENTENCIA DI HUES A CONFIRMA CU HOTEL SECRETS NO TA FORMA MOLESTER PA BISIÑANAN; BOUWVERGUNNING TA CORECTO!



Corte den beroep a dicta sentencia diaranson 10 di januari contra e bisiñanan di Hotel Secrets: E bouwvergunning ta bon y e Hotel no ta causa ningun molester manera bisiñanan ta pretende.

hues a ordena pa hala aden e bouwvergunning cu a wordo otorga pa construccion di hotel Secrets na Sanicolas, indicando cu NO a tene na cuenta e obheccionnan

haci dor di algun bisiña.

Gobierno mester a splica algun aspecto tecnico mas den extenso, cual a wordo haci debidamente. Habitantenan a apela e caso y dia 6 december 2023 e caso a wordo trata.

Diaranson e sentencia a cay y gobierno a gana e caso. E bouwvergunning # 2 ta corecto! Hues a determina cu awor si ta suficientemente prueba cu e

proyecto ta cumpli cu exigencianan di estetica ("welstand") y cu e proyecto lo no causa molester ("hinder") pa e vecindario. Cu esaki e di DOS bouwvergunning ta wordo considera como corecto. Tratamento di e caso riba molester

di sonido, lus y privacidad:

Intresante tabata e deliberacion di hues, si un di e bisiñanan cu ta biba 135 meter leuw di e hotel, ta belanghebbende y tin molester di e proyecto.

Hues a determina cu entodo caso su bista no ta wordo stroba, pero hues a dun'e beneficio di duda ya cu el'a claim cu e lo haya molester di trafico y sonido di e hotel, y lus. Hues a bisa cu e por ta belanghebbende y a bay evalua cada un di nan obheccionnan riba trafico, sonido y lus y a conclui cu e habitantenan no tin rason!

Ta bon pa informa cu tin algun caso mas cu lo tuma lugar den luna di Febuari.

Den otro articulo nos lo bay mas den extenso riba e decision di hues.

POLIS A DETENE HOBEN CU A HORTA UN AUTO PA BAY CAMBIA HERO BIEUW PA ALGO DI COME!



Polis a bay tras di un persona cu lo a horta un auto for di Tanki Leendert, mesora a dirigi patruyanan su tras y ela logra yega te Edisonstraat ubda eynan ela bende un radiator y un bateria di auto pa asina manera e chauffeur mes a bisa ta pasobra e tin hamber



y kier a haya algun florin pa come algo ya cu e tin hopi hamber. Polis a hala su atencion y a detene ya cu e por a puntra y semper lo por haya un hende di bon curason cu sigur lo a dun'e un pida pan of un tayo di cuminda. Ademas polis a confisca e auto pa mas investigacion.



TUMBERONAN DI TAYA A RETIRA DI FESTIVAL DEBI NA FALTA DI PREPARACION Y PROMOCION DI SMAC

Un bes mas e organiacion SMAC ta den noticia. E biaha aki ta debi na e noticia di varios grupo musical cu a anuncia nan retiro for di festival di Tumba 2024 manera: Buleria, D'licious, Shine Music, Robert Jeandor y Solo Banda como tambe OAK.

E Carnaval na Aruba e aña aki ta presenta su mes como un celebracion di 70 aña, pero no ta liber di polemica. Manera un tradicion, e Festival di Tumba ta den controversia atrobe, e biaha aki ta pa falta di esfuerso di SMAC pa organisa un evento di caliber.

E keho principal di e musiconan y tumberonan ta relaciona cu e promocion insuficiente y falta di informacion tocante e festival. Aunke ta spera cu e aña aki lo tabata special, pasobra ta Carnaval 70, e preparacionnan tabatin nan problemanan.

SMAC NO TIN COMUNICACION

E musiconan a expresa nan preocupacion tocante e falta di comunicacion efectivo cu SMAC for di maart di 2023. A destaca

un reunion na november di 2023 unda a discuti puntonan critico pa mehora e festival, pero te awe, no a ricibi confirmacion oficial di nada.

FALTA DI PROMOCION

E falta di promocion tambe ta un punto critico. E inscripcion na Balashi Beer Garden a wordo promovi solamente un dia di promer, y e musiconan ta considera cu no a hasi sufisiente pa hasi e festival atractivo.

E inscripcion a resulta den solamente 6 banda y 9 cantante, cual ta laga e festival refleha como pover y mediocre.

E situacion a yega na un punto critico ora cu varios banda a anuncia durante un conferencia di prensa cu nan no lo partisipa den e festival di Tumba e aña aki. Nicole Martina, na nomber di e banda Buleria, D'licious, Suona, Shine Music y OAK, a entrega un carta expresando nan desicion.

E carta ta accentua dos motibo principal: falta di informacion y comunicacion efectivo, y e promocion deficiente di e evento. E



musiconan ta bisa cu e reunionnan programa pa discuti aspectonan critico no a tuma lugar manera planea, y e falta di claridad riba e premionan y creacion di un categoria nobo di Tumba Loco.

Na e conferencia di prensa, a expresa e preocupacion cu e evento, plania pa 20 di januari 2024, tabata den falta di tempo pa un promocion adecua.


Tambe a menciona e nesidad di un organisacion dedica y cu experiencia pa garantiza exito di e evento.

E polemica a conduci na retiro

di varios banda y cantante, den nan varios ex rey di tumba, lagando e futuro di Festival di Tumba 2024 den situacion di crisis. E carta manda na SMAC ta conclui, expresando e speransa cu e Festival di Tumba por wordo eleva y wordo produci pa un organisacion dedica den futuro, enfocando riba Carnaval di e aña siguiente.

E destino di Festival di Tumba 2024 ta keda insigur, y e comunidad ta keda pendiente di e desaroyonan futuronan relaciona cu e celebracion musical aki.

DESCONOCIDONAN A HORTA AUTO Y MAND'E INTENCIONALMENTE DEN LAMA NA SPAANS LAGOENWEG



Diahuebs madruga durante control di Kustwacht na nos costanan a bin descubri un auto cu su wielnan na laira den lama na Spaans Lagoenweg, mesora nan a avisa polis kendenan na nan turno a

avisa bombero.

Na yegada di bombero mesora 2 bombero a baha den e lama pa asina mira si por tin hende aden y tambe den e baul. Pero no tabata tin ningun hende

den e vehiculo. E auto mes ta un Toyota Yaris blauw cu number A50722. Na e sitio por a mita claramente cu e auto a ser manda den e lama poniendo un bloki riba e trot y a hala e palanca den D di drive y e auto a bay cay den lama.

Takelwagen a ser busca pa saca e auto mas pronto posibel for di lama. Ora a saca e auto a mira e parti abao di e stuurwiel kibra y un bloki cual lo a ser usa pa manda e auto den lama. E mesun madruga aki tambe nan a horta un Toyota



Yaris silver A67728 for di hende cu por a mira e auto Driemasterstraat. Si tin aki yama polis mesora.

Minister Endy Croes: DESPUES DI 13 AÑA A AHUSTA E NORMBEDRAG CU 6.4 MIYON

Diahuebs mainta durante Conferencia di Prensa di Gobierno di Aruba, Minister Endy Croes un bes mas a trata e topico di “normbedrag”. E mandatario di Enseñansa a enfatisa cu “normbedrag” ta ancla den ley y ta e compensacion cu schoolbesturen ta ricibi a traves di “exploitatie subsidie”. E “normbedrag” ta cubri costo di, entre otro, mantencion y seguro di e edificio di scol y lokaal, limpieza di edificio y lokaal, coriente, awa y gas, mantencion di

mueble di e scolnan, inversion den material di desaroyo “hulpmiddel” y necesidadnan di scol, lesmateriaal y administracion. E schoolbesturen ta ricibi un suma cu hopi biaha ta miyones di florin, depende di e grandura di e scol pa cubri tur gasto cu a ser menciona. E ley ta bisa cu cada tres (3) aña mester calcula si mester aumenta e suma aki.

E ultimo rapport oficial ta di aña 2009 y e ultimo aumento a tuma luga na aña 2010. Minister Endy

Croes a sigui bisa cu enseñansa tabata coriendo 13 aña atrasa encuan to e ahustenan necesario pa e “normbedrag” por ta actualisa. Den aña 2023 un team di experto cu ta compronde e materia a haci un investigacion y calculacion. Na final di e investigacion un rapport a keda presenta, unda cu a indica cu mester haal in e suma di 6.4 miyon florin. Dia 4 di september den e tratamiento di “voorjaarsnota”, Parlamento di Aruba a aproba 50%, esta 3.2 miyon florin. Den luna di

december aña 2023, ora cu Parlamento di Aruba a trata Presupuesto di Pais Aruba a aproba e otro 50%, esta 3.2 miyon florin. Pues, un total di 6.4 miyon florin a haal in te cu aña 2023.

Esaki ta significa cu a inverti hopi mas placa den enseñansa pa asina e schoolbesturen por cubri nan gastonan. Minister Endy Croes a subraya cu ta di lamenta cu oposicion a vota contra di ahustacion di e “normbedrag”. Pa conclui, Minister Endy Croes a enfatisa cu entre



e proyecto di construccion di Juliana School, construccion di fase 2 di Mon Plaisir Havo y “normbedrag”, enseñansa di Aruba a ricibi 16 miyon florin adicional.

Minister Rocco Tjon: REUNION CU SMAC KPA CMO Y LIDERNAN DI GRUPO DEN CUADRO DI E TEMPORADA DI CARNAVAL

- Diaranson merdia, minister di Husticia y Asuntonan Social sr. Rocco Tjon a reuni cu SMAC, KPA, CMO como tambe lidernan di grupo di carnaval, den cuadro di e sucedido di diasabra ultimo, durante fakkel optocht. Un reunion sumamente positivo caminda a dialoga entre tur stakeholders.

Loke a bin padilanti durante e reunion aki ta, cu for di november diferente reunionnan a tuma luga, diferente draaiboek a wordo comparti cu tur stakeholder. Den e draaiboek tur hende a wordo informa cu e controlnan lo tuma luga pa loke ta papelnan di auto, trekker y mas. Segun e mandatario,

no obstante tur esaki, e motibo principal di e reunion tawata importante pa planifica y yega na palabracionnan concreto cu otro pa loke ta e luna nos dilanti, pa asina evita loke a sosode fakkel optocht.

Banda di esaki, diferente punto a wordo treci padilanti door di SMAC, KPA, CMO pero tambe door di e lidernan di grupo cu tur stakeholder lo tene cuenta cune pa por garantisa un bon balans, pa percura cu tur hende por gosa di carnaval na un manera sano, pero di otro banda tambe cu nos por garantisa seguridad pa tur hende; mirones, participantenan, e bandanan y pa esnan cu ta traha entre otro KPA, Ambulans y mas.



Di parti e gruponan di carnaval a haya un bon reaccion, caminda a indica di ta compronde e reglanan y tambe ta di acuerdo cu e reglanan aki, sin embargo pa loke ta e parti di comunicacion si lo mester bin un mehoracion di tur banda.

Por ultimo, minister Tjon, a enfatisa riba e hecho cu tin camaranan di seguridad instala riba e rutan di carnaval, cual ta den funcion, y lo bay wordo monitorea henter e temporada aki, pa asina asisti Cuerpo Policial mas eficiente y eficaz.

Ademas, a traha

palabracionnan cu Ministerio Publico pa bin cu listramento preventivo y ta bay percura tambe pa personal adicional pa e temporada aki, pa banda di garantisa seguridad pa participantenan, bandanan, mirones y tur esnan trahando, lo bay garantisa seguridad na nos costanan tambe.

HOTEL SECRETS LO NO AFECTA VISTA DI PLANETA SATURNO PA BISIÑANAN, SEGUN SENTENCIA DI HUES

Den un caso reciente den corte, e hues a emiti un veredicto desfavorabel pa e bisiñanan den conflicto cu e proyecto di Hotel Secrets. Entre e diferente motibonan, un di nan a destaca: e lusnan di anochi cu, segun e bisiñanan lo impedi nan di observa e majestuoso planta Saturno.

Hues a bari e hustificacion aki for di mesa, como un motibo pa para of cancela e proyecto.

E disputa di e barrio a enfoca riba e idea cu e lusnan di anochi di Hotel Secrets lo afecta negativamente e vision astronomico di e residentenan, particularmente di e planeta Saturno.

Apesar di e argumentacion, hues no a acepta e motibo aki como valido pa oponer e proyecto hotelero.

SOLO DI PUEBLO ta opina cu e sentensia ta enfatisa e necesidad pa balansa interesnan di comunidad y progreso economico. Aunke e balor pa hasi observacion astronomico ta reconoci pa algun residente, e hues a duna prioridad na e beneficio general cu e proyecto hotelero por aporta na e comunidad den termino di empleo, desaroyo y contribucion economico. Hues a dicta relaciona cu e

molester di lus cu ta stroba di wak Saturno esaki:

Respecto e molester di lus, hues a constata cu e demandanten ta defini skyglow como e fenomeno unda lus ta wordo refleha riba particula di stof y bapor di awa den aire. Esaki ta diferente, segun demandanten mes, for di nan alegacion cu no tin refleho riba e muraya. Segun demandanten, skyglow ta ocuri mayor parti den ciudadnan grandi y area ku tin hopi glas. Hues basa riba e argumento aki, no ta mira fundeshi pa huzga cu tin molestia di lus. E mesun motibo ta valido pa molester di lus den forma di trespass. Hues no a haña ningun indicacion di un iluminacion exagera for di caya.

Afstand en zicht zijn volgens haar niet de enige criteria waarnaar gekeken moet worden. Ter zitting heeft zij toegelicht dat zij ook gevolgen zal ondervinden van het verkeer naar het hotel toe, van geparkeerde auto's in de woonwijk die niet bij het hotel kunnen parkeren, van licht dat ni de avond van het hotel afkomstig is waardoor zij Saturnus niet meer zal kunnen zien en van het geluid dat afkomstig is van het hotel.*



DENTAL SOLUTIONS ARUBA
 DENTALSOLUTIONSARUBA

Ernesto Bermudez
- DENTAL SOLUTIONS -

Act Now
for Your
SPECIAL SMILE

Public Figure:
Rocco Flava

FREE CONSULTATION

+297 585 3255
 +297 592 9398



Pa un Aruba mas fuerte y resiliente:

TRABOUNAN DI REFORMA TA SIGUI DEN AÑA 2024

E agenda di ehecucion di e prome kwartaal di aña 2024 a wordo publica

Prome Minister Evelyn Wever-Croes:

Manera ta costumber desde aña 2021, cada kwartaal, pais Aruba ta duna un bista di kico ta e pasonan y tambe plannan pa e diferente reformanan cu lo wordo ehecuta den e kwartaal benidero. Pa cu e compilacion di e agenda di ehecucion di e prome kwartaal di aña 2024, por indica cu e biaha aki tambe esnan encarga cu e aspecto di e contenido di reformanan di parti di Pais Aruba, a traha duro y diligentemente pa asina crea e prome agenda di ehecucion pa aña 2024.

Ta importante pa para keto na e asina yama Mini Conferencia cu a tuma luga dia 8 di december ultimo na unda tur esnan cu tawata encarga cu e trabounan di reforma a bini hunto pa asina hunto

reflexiona riba e periodo anterior y tambe tira bista riba e periodo nos dilanti. Ainda tin diferente reforma den plan pa wordo ehecuta como tambe algun cu ya caba ta den ful ehecucion.

E diferente personanan cu ta encarga cu e contenido, por wak bek na un periodo sumamente intensivo pero tambe un periodo sumamente importante pa locual ta crea mas bista di e capacidad y experticio di e aparato gubernamental di Pais Aruba.

Pa e periodo nos dilanti, e aspecto di ownership, y tuma encargo di e reformanan dentro di e contexto local di Aruba, lo ta un tema central pa aña 2024. E experticio pa asina mehora nos aparato gubernamental, servicio publico y como tambe

servicio den otro sector, ta algo cu por wordo encontra riba nivel local, cu espacio pa intercambia cu otro partners den Reino.

E prome kwartaal di e agenda di ehecucion di aña 2024, ta para keto na diferente tema y diferente momento di interes. E aspecto di reforsa e aparato gubernamental lo culmina den april 2024 na unda cu lo tin un miho bista di kico ta e tareanan cardinal cu pais Aruba mester ehersa pa con pa crea mas eficiencia den e aparato gubernamental sin perde di bista e tarea y responsabilidad constitucional cu pais Aruba ta carga.

Riba e nivel di enseñansa tambe, lo traha duro pa ricibi y crea datonan pa por haya informacion mas concreto y tuma



desicionnan den un forma di un asina yama 'registratie systeem van kengetallen'. Esaki lo haci mas posibel pa tin un miho bista di kico ta e progreso den enseñansa y con por maneha y ahusta strategia unda cu ta necesario.

Pa loke ta trata cuido, lo tin tambe algun pasonan grandi cu lo wordo tuma na unda cu lo mehora e conexion entre dunadonan di cuido. Asina e ciudadano ta yega un paso mas cerca di ricibi miho cuido door di miho comunicacion entre

diferente nivel di e red di cuido.

Prome Minister Evelyn Wever-Croes ta gradici e ekipo cu a traha duro riba e contenido di e agenda di ehecucion pa aña 2024. Y asina tambe por conclui cu den aña 2024 lo sigui traha riba e reformanan den contexto di Aruba, lo sigui reforsa na unda cu ta necesario pa reforsa pa asina sigui hiba nos pais padilanti. Link pa e Uitvoeringsagenda: [uitvoeringsagenda&c=63834](https://www.aruba.gub.nu/uitvoeringsagenda&c=63834)

AUTO LAGA ATRAS SIN PLACHI NUMBER NA PALM BEACH TA SOSPECHOSO



Diahuebs madrugada durante patruya polis a nota un auto Toyota Tercel sin number laga atras. Polis no por a saca mucho informacion for di e auto y como no tin un auto asina

raporta como horta a dicidi di lag'e eynan y si acaso mas informacion drenta lo wak kico lo haci cun'e. Si abo tin un auto asina y bo no tin e cu'bo yama polis pa raporte.



Minister Dangui Oduber

MINISTER DI TURISMO TA ANUNCIA E PROYECTO PA EMBEYECE “WELCOME FESTIVAL PLAZA” CU TA BAY ELEVA E EXPERIENCIA DI NOS BISHITANTE NAN CRUCERO



–Minister di Turismo y Salud Publico sr. Dangui Oduber a anuncia durante un conferencia di prensa cu e proyecto di embeyecimento di un plaza cu nos lo yama “Welcome Festival Plaza” ta bay cuminsa cu su prome fase. Minister Dangui Oduber conhunto cu CEO di APA sr. Marc Figaroa a presenta e masterplan, cu tur e proyectonan di Aruba Ports Authority N.V. (APA) den progreso pa 2024 y 2025.

Minister Dangui Oduber a splica cu tin vision den APA su masterplan pa sigui diversifica entradanan pa APA y pa Aruba su producto por keda competitivo compara

cu otro islanan den Caribe. E masterplan di APA ta enfoca ariba proyectonan manera Port City, Ex-DOW gebouw, e Cruise Expierence Development Plan y Barcadera Business Park. Tur e proyectonan aki sigur lo bay crea oportunidadnan nobo, crea cuponan di trabou y lo bay trece mas entrada pa asina por sigui inverti den nos turismo.

Ademas, e proyecto di Welcome Festival Plaza lo bay ricibi un embeyecimento completo cu lo inclui un area recreativo, iluminacion, sombra pa proteha contra solo, diseño de paisahe cu hopi matanan y lo bay drecha e estetica di



e kiosconan y lo percura pa tin bañonan renoba pa mehora e experiencia pa e turistanan y localnan. APA su masterplan ta keda desaroya conforme e vision cu Ministerio di Turismo tin pa asina crea un bon experiencia y cumpli cu

tur e necesidadnan di nos turista y bishitantenan di crucero. Minister Oduber a menciona cu e ta contento cu e gerencia di APA pa e bon synergia di trabou y tambe departamento di gobierno pa e bon cooperacion

pa asina por desaroya un area completamente embeyeciendo y transformando pa crea un ambiente di bon bini tropical pa nos bishitantenan.

CAMBIA PERSPECTIVA TOCANTE OBESIDAD: SA BO NUMBER Y MIDI BO PESO



FYSIO FIT PA 60+ DEN BARIO DI PIEDRA PLAT




Diaranson awor 17 di January 2024 ta cuminsa un programa special pa nos adultonan mayor 60+ na Fundacion Centro Famia Piedra Plat. E programa aki ta tuma lugar un biaha pa siman riba diaranson parti mainta entre 9:00 pa 10:00 AM. Participantenan

lo wordo evalua y lo wordo poni den grupo abase di nan abilidad fisico.

Danki na CEDE Aruba y Fundacion Movimento ta Bida cu nos por cuminsa aña 2024 den movecion y ta activo cu nos adultonan mayor. Tur persona cu ta di 60+ por bin libermente.

Adres di FCFPP ta Piedra Plat # 50 net pariba di Compleho Deportivo Franklyn Bareno. Pa cualkier pregunta, por consulta cu nos fysioterapista, Sra. Ivonne Andrade na Cel: 564-9817



HOBEN MOTOCICLISTA SERIAMENTE HERIDA DESPUES DI ACCIDENTE NA KAS ARIBA



Caya Apolonio Werleman/ Kas Ariba - Diaranson anochi algo pasa di 8'or y mey polis a bay cu urgencia un t-kruising ariba Caya Apolonio Werleman, pa un accidente entre auto cu brommer.

Na yegada polis ta tuma

nota cu tawata trata di un accidente serio, mirando cu e hoben motociclista a ricibi tur e golpi na su cabes y tawata bayendo for di tino.

Na e sitio por a nota cu e pick un Chevrolet S10 maneha pa un cabayero di edad, posiblemente no a mira e brommer y a bay bira na su man robes.

Aki ta unda e brommer a drenta bou di e parti dilanti di e pickup, causando hopi e hoben a ricibi golpinan fuerte na cabes.



urgencia pa Hospitaal.

Dos unidad di ambulance a yega e sitio, y asina por a mira un grupo di Paramediconan prepara e hoben pa transport'e cu

Polis di trafico na e sitio a haci su investigacion y den un rato por a habri e caminda bek.

Minister Endy Croes:

A REUNI CU E CABESANTENAN DI SCOL DI DPS PA TRATA DIFERENTE PUNTO DI AGENDA PA AÑA 2024

: Diaranson mainta, Minister di Enseñansa y Deporte Endy Croes a reuni cu e cabesantenan di scol di Dienst Publieke Scholen (DPS). Tambe presente na e ocasion aki, tabata e management team di DPS y staf di Ministerio di Enseñansa. Durante e reuniona contestadiferente inkietud di e cabesantenan y a trata diferente punto di agenda encunto enseñansa, entre otro, BVVD, ambtsjubileum, invalster, maestro di guia, structura di cuidu, dia di compensacion y profesionalisacion pa docente.

Minister Endy Croes a informa e cabesantenan cu tin un comision cu ta consisti di profesionalnan di Departamento di Enseñansa Aruba,

Inspeccion di Enseñansa Aruba y representantenan di tur schoolbestuur, unda hustamente ta trahando riba e puntonan aki. A palabra cu pa e luna di februari mester ricibi un conseho final di e comision aki pa asina implementa e plan y vision nobo augustus 2024.

Tambe a informa e docentenan cu pa profesionalisacion di docente a introduci e plataforma digital Matrix, unda por sigui diferente curso online y na final di e curso ta haya un certificado. Fuera di esaki, a firma un acuerdo recientemente cu Center for Teaching Excellence di University of South Carolina, cual ta brinda nos docentenan di Aruba e oportunidad di ricibi les

online di e docentenan di e universidad aki. Esaki sigur ta otro logro grandi cu ta beneficioso pa nos docentenan di Aruba, unda cu nan por sigui crece, profesionalisa y desaroya nan mes.

Por ultimo, e mandatario di Enseñansa a elabora den linea grandi riba e trabounan cu a realisa pa enseñansa di Aruba y e trabounan cu ainda ta den ehecucion. Un tremendo reunion, unda a brinda tur informacion necesario na alrededor di 20 cabesante di scol di DPS. Finalmente, Minister Endy Croes ta indica cu el a ricibi un reaccion positivo di e cabesantenan y ta desea cu e aña aki por sigui traha hunto pa e progreso di enseñansa di Aruba den su totalidad.



KvK ta anuncia directiva pa aña 2024:

A ELIGI PRESIDENTE Y VICE-PRESIDENTE NOBO DI DIRECTIVA DI KVK

– Conforme e stipulacion den ley, Camara di Comercio y Industria (KvK) ta representa comercio y industria di Aruba. E directiva di KvK, cu ta consisti di 9 miembro, ta wordo eligi door di representantenan di negoshinan grandi “grootbedrijf” como tambe di negoshinan chikito “kleinbedrijf”. Den e prome reunion di directiva di KvK, e miembronan ta eligi un presidente y un vice-presidente pa e aña actual. Alabes ta keda determina cual miembro lo fungi como e presidente suplente. E presidente y vice-presidente, hunto cu e secretario/director ehecutivo, ta forma e directiva diario di KvK.

Pa aña 2024, e miembronan di directiva a eligi unanimamente

sr. Diederik Kemmerling como presidente y sr. Robert Croes como vice-presidente. Sr. Kemmerling ta un comerciante den e ramo di marketing y ta residencia na Aruba pa mas di 12 aña. Alabes e ta miembro di e directiva di KvK ya pa tres aña. Sr. Robert Croes ta un comerciante cu ta activo den diferente sector y ta miembro di directiva di KvK desde aña 2023. Demas miembronan di directiva KvK ta sra. Monica Kock, sr. Gavril Mansur, sr. Eugene Farro, sr. Derrell Maxwell y sr. Omar Tromp cu lo fungi tambe como presidente suplente den caso cu e presidente of e vice-presidente ta ausente. Miembronan nobo ta sr. Devaney (Dave) Martinus y sra. Nathalie Moore.

KvK a tuma despedida di sra. Lay Hing de Kort-Yee y sra. Wanda Broeksema.

E directiva di KvK ta encarga cu e maneho y strategia di e organizacion, cu asistencia di e secretario/director ehecutivo, sr. Martijn Balkestein, kende alabes hunto cu e personal di KvK ta percursa pa e funcionamiento y actividadnan diario di KvK.

Nos team cu tin comercio na pecho E directiva ta consisti di empresarionan cu tin Aruba y e sectornan comercial na pecho y cu den nomber di sector priva ta traha duro pa mantene bon comunicacion cu sector publico. Directiva di KvK ta dispuesto pa sigui duna su aporte



y lo keda boga pa tin mas dialogo entre gobierno y e sector priva pa asina conhuntamente por atende e diferente puntonan di atencion y di preocupacion di e sector comercial. KvK lo percursa pa ta mas activo e aña aki y lo organisa diferente actividadnan pa ricibi feedback di nos empresarionan y tambe pa KvK por comparti informacion y experticio.

FORTALEZA PA FAMIA

Scirbi pa Pastor Marcel Balootje.

PAKICO PERSISTI DEN MALDAD, SABIENDO LOCUAL CU TA BON

Ta para scirbi den e buki di Santiago 4 capitulo vers 17: Pesey pa esun cu sa di haci loke ta bon. Y no ta hacie, pa e esaki ta pica. Pesey e palabra di Dios ta bisa nos den Romanos 12:2 : No sea conforme e mundo aki, ma sea transforma pa medio di e renobamento di boso mente, pa boso por comprende, kico ta e bon y agradabel y perfecto voluntad di Dios.

No stima e mundo, ni e cosnan di e mundo. Si un hende ta stima mundo, e amor di e Tata no ta den dje.

Pasobra tur locual tin den mundo, e deseo di carni, y e deseo di wowo, y e orguyo di bida, no ta bin di e Tata, sino di e mundo. E mundo ta pasa bay y su deseonan tambe, ma esun cu ta haci boluntad di

Dios, lo permanece pa semper. (1 Juan 2:15-17), E palabra di Dios ta bisa nos den Isaias 5:20: Ay di esnan cu ta yama loke ta malo bon, y loke ta bon malo, loke ta scuridad lus, y loke ta lus scuridad, loke ta marga dushi, y loke ta dushi marga.

Hende mester tene bon cuenta ora di persisti den maldad, conociendo e bondad di Dios, conociendo su misericordia, conociendo locual Dios ta odia, y toch pa motibo di capricho y curazon duro cu no kier pordona ta sigi den maldad.

Ora Dios ta manda nos pordona, ta pasobra Dios kier nos libertad, pero si nos ta hunga rol di orguyoso, duro y rebelde y no kier reconoce Dios, nos lo sinti e furia di Dios.

Awor mas cu nunca den e tempo trabahoso aki, nos mester depende mas di Dios, pasobra ta solamente

Dios por saca Su pueblo for di tur e peligran cu ta na caminda.


A yega tempo pa nos por separa for di maldad, busca e caminda di Dios, y sigi Dios, aparta for di tur locual ta impuresa, pasobra hopi bi-aha hende ta busca beneficio for di maldad, envez di aparta for di maldad.

Bo ta keda straño di mira con hende cu mester sa mihor ta apoya maldad, perversidad, y inmoralidad, buscando nan propio interes, sin tene cuenta ken of cual famia por wordo afecta.

Tur esnan cu no kier reconoce Cristo Hesus como nan Señor y Salvador, ta gaña nan mes pasobra no tin otro caminda. Cristo Hesus ta y ta keda e unico caminda di berdad y bida.

Awor no ta bon pa hende provoca Dios, no ta bon pa hende scucha e bos di Dios y sigi den nan maldad, comosifuera nan no tin cuenta of no ta respecta Dios. pasobra mescos cu den pasado, Dios a actua cu man duro contra un pueblo murmurador y rebelde, awe e ta spierta nos pa medio di Su palabra di tur consecuencia.

Wak bon rond di nos, y nos tur ta ripara, con hende grandi ta instrui mucha, pa sigi cana den mesun caminda di eror, cu nan a cana, den nan hubentud, y nan kier mira otro resultado for di e hubentud, pero bo no por cosecha



diferente, si bo ta sembrando mesun cos.

Dios no por wordo engaña tur locual hende sembra esey nan lo cosecha, hende ta lubida, cu Dios

conoce cada intento di nan pensamiento, Dios conoce tur curason.

Pesey si awe boso scucha Su bos no haci boso curason duro, pasobra duresa di curason ta tempo perdi.

Dilanti di Dios tur curason mester arepentí, tur lenga mester confesa, y evita di montona furia di Dios. (Romanonan 2;5).

Sinceramente Pastor Marcel Balootje.

Polis a atende cu chauffeur bao influencia di medicina cu a reverse dal riba cura di cas



Diaranson anochi pra cu polis tabata atendiendo e accidente na Santa Cruz eybanda mes un auto a bay reverse y a dal un cura di cas y a sigi core bay. Testigonan a nota e number y a wak ki direccion ela tuma y polis a bay su tras. Polis a logra para

e chauffeur y a kere cu e ta bao influencia di alcohol y a bay test e. A bin resulta cu e homber no tin nada di alcohol den su curpa pero ela admiti cu ela caba di tuma remedi y esey por afecta su reaccion. Polis a lag'e yama un familiar pa bin buske.

SOLO
BRIYANDO FUERTE • TRECIENDO CLARIDAD
Di Pueblo

Tipline: 585 9500

e-mial: solodipueblo@gmail.com

Cuida bo cara cu e simpel pasonan aki

E cara ta e prome cu un persona ta mira. Nos por bisa cu ta nos carta di presentacion. Por lo tanto, mantene bo cara saludabel ta practicamente un obligacion.

Sin embargo, tin biaha cu rutina, stress y obligacionnan, nos ta descuida e aspecto di e cara.

Esaki ta algo inconveniente ya cu, despues cu e daño sosode riba e cuero delicado di e cara, ta hopi dificil pa bay bek.

P'esey, nos a dicidi pa recolecta un serie di paso importante pa bo por cuida bo cara, aunke bo tin un dia ocupa.

No ta trata di aplica productonan cu ta tapa e cuero, sino di mantene e salud di e cuero di e miho manera posibel.

Cuida bo cara cu e simpel pasonan aki

1. Siña ki tipo di cuero bo tin

Prome cu tur cos, bo mester sa ki tipo di cuero bo tin. Esaki ta algo indispensable prome cu cuminsa cualkier rutina di beyesa, incluyendo e makiyahe.

Si bo cuero ta vet of mixto, lo bo no tin e mesun cuidado, ni por uza e mesun productonan cu si bo cuero ta tipo seco, atopico of



sensibel.

2. Rutina di limpieza

Un di e pasonan mas importante, y cu nunca mester faya pa e cuidado di e cara, ta e limpieza adecuado di e cutis.

Ta fundamental realis'e dos biaha pa dia. Cu un rutina di limpieza facial, bo por elimina e impuresa cu ta bin acumulando.

Asina bo por evita e aparicion di imperfeccion, infeccion of mancha.

- Si bo cuero ta vet of mixto, bo mester uza productonan cu ta logra disminui e exceso di vet (sebum) pa evita cu por produci e obstruccion di e porionan.

- Si, por contrario, bo cuero ta seco of delicado, bo mester uza productonan cu ta menos fuerte, pa e no seca ainda mas.

3. Humectacion y hidratacion

Ta un paso vital di e proceso aki. Ta importante, cu despues di realiza e limpieza di e cutis, bo aplica un producto humectante y hidratante.

Cu e simpel paso aki lo bo logra evita e daño celular y disminui e riesgo di embehecimento prematuro.

Sigura bo mes pa uza e producto adecuado pa bo tipo di cuero.

4. Proteccion solar

Semper bo mester pone sunblock of protector so-

Kisas bo no lo nota e efecto inmediatamente, pero si cu e paso di tempo. Hasta, e efecto acumulativo por deriva den un tipo di cancer di cuero.

Asina ya, ocupa bo mes di busca un bon sunblock di acuerdo cu bo tipo di cuero. Tambe ta existi makiyahe cu factor di proteccion den su formulacion cu bo por aplica.

Ta hopi importante cu bo brinda e cuidado necesario, uzando productonan cu ta indica specialmente pa e zonanan aki.

6. No mishi cu e cara

Ta hopi comun hiba e mannan na e cara den cualkier momento di dia. E problema ta radica cu e mannan ta bira vet y ta acumula contaminantenan cu por pasa riba e cuero di cara.

Como consecuencia, por obstrui e porionan di e cara, contribuyendo na e aparicion di acne.

Tambe nos mester evita, na medida di lo posibel pa nos para mishi e imperfeccionnan, manera puistjes, e cicatris y comedonenan. E accion aki solamente por empeora e estado di e cuero.

7. Bebe hopi likido

Awa no solamente ta nutri e cuero, sino cu e ta yuda elimina e toxina, impuresa y e vet cu por acumula riba e cuero, specialmente e cara.

Si te cu awor aki bo no a tene na cuenta, cuminsa awe mes pa mantene e cuero radiante.



lar, riba bo cara, ainda si bo ta sali cana riba caya.

Corda cu e radiacionnan solar tin efectonan dañino riba e celnan di e cuero, acelerando e aparicion di signonan di embehecimento manera lachi y manchanan scur.

Busca loke miho por adapta na bo y cuida bo cuero den tur momento.

5. Cuida e cuero delicado
Cuero di e lipnan y rond di e wowonan, ta mas delicado cu e resto di e cara.



Prostate MRI Screening awor obtenibel na Aruba

Na Aruba tin e tradicion pa basta tempo caba di bay busca atencion medico den exterior. Pa diferente motibo: Kisas tabata tin algun experiencia positivo den pasado cu dunadonan di cuido den exterior na centro nan medico, por ta nan ta prefera keda cu miembro nan di famia y kisas nan ta biba afo, tin algun ta pa motibonan priva, no tin mester splicacion. Esaki ta un isla chikito y mayoria di nos kier evita haci nos asuntonan medico publico. Tambe mayoria di biaha tin un percepcion cu dunadonan di cuido den exterior ta brinda miho servicio pasobra cierto tratamiento no ta obtenibel na Aruba. Ta comprendibel cu a pesar cu e nivel di cuido medico y ekipo na Aruba no ta halto, no ta tur cos ta accesibel. Kisas e tamaño di Aruba no ta hustifica e inversion, y limitacion den caso no ta duna mediconan local hopi practica, pa segura calidad y seguridad. Den algun caso, e establecimiento medico no kier ni 'bay eynan mes' y mishi cu e tema aki. Pa tur e motibonan, AZV, ta manda pashent afo pa Colombia of Hulanda. Sea ta un hospital sugerí pa AV, of e escogencia di e pashent mes pa su dunado di cuido. AZV mester cubri tur cos pa ley. Tur aña algun 1,000 pashent ta bay afo. Pero, tin progreso, aumentando den e area di mas hende kedando rib'e isla pa ricibi screening of tratamiento, y pashent cu ta prefera e opcion ey enbes di biaha bay un caminda no familiar. AZV, durante transcurso di tempo, ta purbando na ofrece mas solucion lo-

cal, altamente aprecia y preferi. Manteniendo pashent na cas ta reduci gasto pero tambe reduci inseguridad, ansiedad y falta di preparacion, hunto cu varios otro factor cu ta trece hopi stress. Manera hopi di boso sa, cancer di prostaat ta e di tres cancer mas comun na Aruba serca hende homber. Mayoria di biaha cancer di prostaat no ta mata e pashent, pero no ta algo cu por keda sin trat'e. Complicacion di e enfermedad of tratamiento por perhudica e calidad di bida di hende homber. Afortunadamente, tratamiento efectivo y intervencion preventivo cu prueba ta obtenibel, cu por yuda minimalisa e mal contenido y riesgo devastador di sigui crece mas ainda. E palabra magico ta MRI, Prostate MRI. Despues di a identifica e presencia di cancer di prostaat pa medio di haci un MRI Screening, tratamiento por cuminsa. Un cantidad di mas o menos 250 hende homber ta biaha den exterior pa haci MRI di prostaat anualmente riba costo di AZV. Placa di pueblo. Desde aña pasa, tin mas capacidad di MRI riba Aruba. E prostate MRI cu HOH, Dr Horacio Oduber Hospital no por ofrece, awor ta obtenibel den cercania na Punto Brabo Diagnostic Center, banda di Urologist Outpatient Consultation Practice. E capacidad di MRI na Aruba ta mas cu adecua pa e cantidad di caso cu ta sali for di Aruba. Sin embargo, AZV ta haci uzo di e capacidadnan cu tin obtenibel? E contesta ta no. Desafortunadamente, ta ignora esaki. HOH tin



un lista di espera masha largo y pashent adicional ta wordo manda afo pa MRI na Colombia mientras cu e ta obtenibel aki mes. Pa ningun razon specifico. Banda di esaki AZV tampoco no ta habri pa un cambio. No tin hustificacion pa manda hende homber afo pa MRI Screening. Aki na Aruba mes por. Esfuersonan anterior pa convence AZV pa re-evalua su maneho no a duna fruto. AZV ta insisti pa manda pashent afo mientras cu no tin motibo valido pa haci esaki, ningun obstaculo legal of falta di espacio. AZV ta para firme den su flipflops pa bira un proveedor exclusivo MRI Screening. Pashent cu sintoma cu no ta desea di biaha y cu ta limita na tempo, por disfruta di e servicionan di Punto Brabo Diagnostic Center pa un suma razonabel y haya nan MRI pa despues simplemente cruza caminda pa wak nan dokter cu nan resultado den man. Tambe, ta derecho di pashent pa haya e placa aki bek p'e costo di e tratamiento, ora di uza un dunado di cuido alternativo manera ta ankra den ley. Punto Brabo Diagnostic Center a cuminsa na brinda e posibilidad

pa pashent por haci nan screening aki mes cu derecho di compensacion pa AZV basa riba articulo 25, lid 2, e mesun articulo cu ta haci'e posibel pa AZV paga hospital na Colombia.

E tecnologia obtenibel ta esun di mas nobo den MR na Caribe Hulandes, supervisa pa un team multidisciplinario di especialista, radiologo di BIG y ARU-BIG, un team di seis profesional.

PRONOSTICO DI TEMPO

VALIDO TE DIABIerna 12 DI JANUARI 2024, 18:00 ORA TEMPO:

AWE TARDI Y AWE NOCHI: PARCIALMENTE NUBLA Y GENERALMENTE SECO

DEN MARDUGA Y MAYAN: PARCIALMENTE NUBLA CU UN AWACERO PASAJERO

AVISO/ ALERTA:

TA SUGERI OCUPANTENAN DI BOTO CHIKITO PA BAI CU

CAUTELA NA PARTINAN OOST TE NOORDWEST DI COSTA Y LAMA HABRI.

PRONOSTICO DI TEMPO PA PROXIMO 3 DIANAN:

PARCIALMENTE NUBLA CU UN AWACERO BREVE.

BIENTO LO TA FOR DI DIRECCION OOST Y MODERA

TE BASTA FUERTE, FUERTE TE POSIBLEMENTE DURO DEN RAFAGA;

TEMPERATURA (GRADO CELSIUS) MAX / MIN LO TA: 32 / 26

Minister Geoffrey Wever:

A informa Parlamento di Aruba riba crecimiento di economia di Aruba den 2023 y pa 2024



Awe 11 di januari 2024 durante un Openbare Bijeenkomst Minister Geoffrey Wever hunto cu Departamento di Asuntonan Economico, Comercio y Industria a duna Parlamento di Aruba un update di e Economic Outlook 2023-2024. Manera indica durante tratamiento di presupuesto 2024 di Pais Aruba den december 2023, e update aki ta representa un ahustacion di e Economic Outlook 2023-2024 publica den juni 2023 y ta basa riba ultimo informacion disponibel di nos economia. Den e Economic Outlook di juni 2023 Departamento di Asuntonan Economico, Comercio y Industria a premira un crecimiento economico di 10.1 por ciento nominal den 2023 di 10.1% y pa 2024 un crecimiento di nos economia cu 4.6 por ciento nominal. Segun e December Economic Outlook 2023-2024 Departamento di Asuntonan Economico, Comercio y Industria ta ahusta e proyeccion di crecimiento

di economia di Arubapa 2023. Basa riba analisis di ultimo lunanan di 2023, ta premira cu nos economia a crece cu 13.7 por ciento pa yega un balor di 6.8 miljard florin, esaki ta igual na 112.1 por ciento di e nivel di 2019 (6.0 miljard florin). Pa 2024 segun calculacionnan di Departamento di Asuntonan Economico, Comercio y Industria ta premira un crecimiento di 3.0 por ciento den termino nominal di e Producto Interno Bruto (PIB), e indicador pa midi actividad economico. Cu un balor di 7.0 miljard florin, esaki ta igual na 115.5% por ciento di e nivel na 2019 (6.0 miljard florin). E expansion di actividadnan economico pa 2024 ta basa riba crecimiento di nos industria turistico y crecimiento di consumo y inversion priva. Esaki ta demostra confianza den nos isla como destinacion turistico y pa inversion. E revision di proyeccion di crecimiento di economia di Aruba ta den liña cu e ultimo di expectativa economico di

Centrale Bank van Aruba cu ta premira un crecimiento economico di 4.0 por ciento den termino nominal den 2024.

Pa facilita proyeccion di e economia di Aruba, DEACI ta haci uzo di e modelo macro-economico MARUBA. E modelo MARUBA ta basa riba e Cuentanan Anual di Pais Aruba publica pa CBS y ta refleha e funcionamiento di e economia di Aruba.

Maneho di e modelo MARUBA ta cay bao responsabilidad di DEACI. Pa yega na e proyeccionnan economico, DEACI ta den dialogo continuo cu diferente instancianan y expertonan local, y a base di analisis di diferente desarojo, ta produci proyeccionnan economico.

Ministerio di Asuntonan Economico, Comunicacion y Desaroyo Sostenibel

conhuntamente cu Departamento di Asuntonan Economico, Comercio y Industria lo sigui monitor desaroyo di economia di Aruba.

Minister Geoffrey Wever kier gradici directora Maria Dijkhoff-Pita y e afdeling Economisch Beleid en Onderzoek cu ta haci e economic outlook posibel. E publicacion completo ta disponibel riba e website www.deaci.aw.

PUEBLO A HAÑA SU PEN BEK

Pa kualkier informacion
solodipueblo@gmail.com
of
585-9500

Clasificados

SOLODIPUEBLO@GMAIL.COM
CEL. 585 9500

SOLO
Di Pueblo

**Ta Busca,
Looking for
"BOBCAT"
CAT236B!
Paga Cash or
Transfer!
Whatsapp
5648009**

**Ta Busca,
Looking for
Excavator
operator!
Good Salary!
Whatsapp
5648009**

Muchanan baldadi di Bushiri Residences a pega monton di sushi na candela den oranan di madrugada




Diahuebs madrugada a drenta informe di un candela na Bushiri Residences como bombero na e sitio. Na yegada di e patruya a



bin topa cu un monton di sushi na candela cu muy probablemente e muchanan baldadi di Bushiri a cende. Na yegada di bombero mesora nan a combati y paga e candela prome cu ela sigi expande.

Polis a bay na un bar pa un pareha bao influencia papiando duro y causa molester



	8					3	
2			6	7			1
	6		2	1		7	
5							3
9			7	5			8
4		1	3		9	7	6
	2					1	
8		3	1		6	5	9

LEY CU TA LIMITA UZO DI PRODUCTIONAN DI **TABACO**

PROTEHANDO SALUD PUBLICO

6 Ta prohibi pa bende of duna productionan di tabaco na personanan bou di 21 aña

SOLO De Pueblo **HALA ROSEA LIBREMENTE**

Diaranson anochi a drenta informe di cu tin un pareha bao influencia papiando duro y causando molester den un bar na Santa Cruz, mesora a dirigi un patruya na e sitio.

Na yegada di e patruya a bin topa cu e pareha y a papia cu nan.

Como nan ta biba ey cerca polis a laga nan cana bay man teni direccion nan cas.

Laga tur loke ta sperami ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esaki nan termina den tur bunitesa

Agradecido pa tur locual cu e la significa pa nos, pero conforme
cu boluntad di Dios nos ta anuncia

fayecimento di nos mama, ruman, wela, bisawela, suegra,
tanta y madrina:

Clotilda Maduro

Mihor conoci como "Titi" of "Dudu"

Vuida di Mario Dijkhoff

Na number di su yiunan:
Emilio y Esther Thiel-Arends y famia
Shelley Thiel y famia
Joseline Thiel y famia
Tata di su yiunan:
Antonio (Efe) Thiel Q.E.P.D.
Rumannan:
Marianne y Jose Figaroa-Maduro y famia
Edwin y Nicha Maduro-Barros y famia
Chila y Mariano Angel-Maduro y famia
Vallita y Micheal Hoo-Maduro y famia
Glenn y Judith Maduro-Dirks y famia
Nieto/a nan:
Emile Thiel y Carolina Thiel-Span
Daryll Thiel y Mary Geerman
Ken Thiel
Andrew Feliciano
Daniella Robles de Medina
Andric Feliciano
Ashwin Feliciano Y Lady Aquilar
Ritchie Thiel y Lousette Rafael
Ashton Feliciano
Anshellie Feliciano y Brandon Tromp
Bisanieto/a nan:
Davey, Gian Luca y Anayah
Sobrino/a nan:
Jeanny Maduro, Josanne Oduber, Jacqueline Nadall, Ryan Maduro, Hose (Jo-mar) Figaroa, Michelle Sheffer,
Joanne Erasmus, Natalie Zorich, Nicole Hoo, Glenbert Maduro, Jurianne Maduro, Glenrick Maduro
Ihanan: Filomena (Mena) Geerman y Stanley Banfield

Personanan cu a cuide: Erica y Laimar
Tanta y omonan, primo y primanan, amigo/a nan y demas famia:
Thiel, Arends, Maduro, Feliciano, Robles de Medina, Hoo, Nadall, Angel, Bar-ros, Schwengle, Span,
Figaroa, Banfield, Wouters, Oduber, Sheffer, Zorich, Tromp, Aguilar, Geerman, Angela, Medford, Ras,
Hernandez, Erasmus, Petrochi, Kock, Betancur, Rafael, Dijkhoff, Cruz, Gil, Lacle, Dubero

Amistad di cas: Cenith Span
Nos disculpa si den nos tristeza nos por a lubida algun fam di famia

Ta invita tur famia, amigo y conocir pa asisti na e acto di
entiero cual lo tuma lugar diasabra 13 di Januari 2024.

E restonan mortal di nos Dudu stima lo ta reposa
for di 9or di mainta pa 11or di merdia na Royal
Funeral Home (Dilanti Cmart)

Nos ta lamenta cu despues di entiero nos lo no
ricibi bishita di condolencia na cas.



Sopi di letranan

P	I	E	Z	A	S	K	G	Y	E	Y	H	C	• JAQUE
Q	P	R	O	M	O	C	I	O	N	M	V	A	• MATE
G	D	E	N	R	O	Q	U	E	A	O	V	P	• ENROQUE
T	W	R	T	D	C	I	D	T	C	D	B	T	• PROMOCION
Q	A	Z	E	A	H	V	E	S	L	A	M	U	• APERTURA
B	L	B	D	M	B	C	M	Y	D	P	G	R	• DEFENSA
C	W	J	L	H	G	L	K	U	E	E	A	A	• CAPTURA
S	N	E	L	E	L	C	A	Y	F	R	M	J	• TABLAS
F	U	W	P	J	R	D	Z	S	E	T	B	G	• GAMBITO
S	Q	T	Y	A	A	O	V	N	N	U	I	E	• PIEZAS
I	N	M	J	N	E	Q	T	C	S	R	T	L	• TABLERO
Q	T	O	Z	Z	A	M	U	G	A	A	O	P	
U	B	B	L	U	J	D	H	E	M	N	J	R	

ORACION DI DIA



Un feliz dia bendiciona colma cu hopi amor, fe y speransa den nos Bon Dios

Despues di un rato e cria a bisa su shon: 'Señor a
cumpli cu bo ordo,
ma toch a sobra luga!' (Lucas 14: 22)

Nos ta forma un solo curpa pa medio di nos union
cu Cristo y nos ta uni mescos cu partinan di un
solo curpa (Rom. 12: 5). E cria lo a haya duele ora
prome invitadonan a nenga. Asina mes el a sigui
cumpli cu ordo di su shon y aunke el a cumpli toch
a sobra luga. Esaki ta muestra cu e ta persevera y
cumpli cu zelo cu su shon y ta na paz. Nos tin cu
traha pa, y sirbi Señor cu zelo (Rom. 12: 11). Pero,
Señor tin mas luga, pues e capacidad pa invita-
donan pa e reino di Dios ta surpasa e expectativa
di cada un di nos. Hesus ta siña nos pa cumpli cu
ordo di Tata. Aunke nos por pasa den tribulacion
y perseverancia, oracion constantemente ta yuda
paso e speransa cu nos tin lo haci nos contento
(Rom.12: 12). Paso cerca Señor nos ta na paz
manera un yiu cerca su
mama (Salmo 131).

Oracion: Señor regala nos gracia pa nos comparti
donnan conforme Bo
boluntad y biba den harmonia cu otro.
Amen.

Chauffeur a cay den e greppel yegando rotonde Hato y a subi den otro auto bay, despues un hende a kita e plachi number



Diahuebs madruga a drenta informe di un accidente pariba di e rotonde Hato,

mesora a dirigi un patruya na e sitio. Na yegada di e patruya a bin compronde

cu aki ta trata di e Mitsubishi Lancer blanco A37240 cu pa un motibo of otro

a bay cay den e greppel. Djey un otro auto a pasa e chauffeur a subi den dje y a bay for di e sitio. Un rato

despues un hende a bini y a kita e plachinan di number y bay cu nan.

Chauffeur no a regula su velocidad ni a mantene distancia a bay dal tras di auto



Diaranson merdia a drenta informe di un accidente na Santa Cruz, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e Chauffeur di un Lincoln MKc no a regula su velocidad ni a mantene distancia a bay dal tras di Toyota Yaris. Afortunadamente ningun hende a resulta herida.

Obituario

Publica serka nos anuncio di fayecimento di bo ser keri.
Nos tin 2 pakete pa ofrece;

Pakete 1: Anuncio di fayecimento te dia cu e defunto
ser dera

Gradicimento y invitashon pa misa pa 3 dia AFI 250,00

Pakete 2: Anuncio di fayecimento te dia cu e defunto
ser dera

Gradicimento y invitashon pa misa pa 3 dia

Na Canal 22 1x prome cu Noticiero 22 Afi 400,00

Pa mas informashon por tuma contacto cu oficina na
585-9500 of na 741-4554